

## ՀԱՅ ԱՌԱՔԵԼԱԿԱՆ Ս. ԵԿԵՂԵՑՈՒ Ս. ՊԱՏԱՐԱԳԸ

«ՀՈՎԵՐ» ԿԱՄԵՐԱՑԻՆ ԵՐԳՉԱԽՈՒՄԲ

ԿՈՄԻՏԱՍ  
ՍՈՒՐԲ ՊԱՏԱՐԱԳ

ՄՀԵՐ ՆԱՎՈՑԱՆ  
*Արվեստագիտության թեկնածու*

© CD (Լազերային սկավառակ)ՀՈՎԵՐ 2006

Ս. Պատարագը Հայ Առաքելական Ս. Եկեղեցու գլխավոր արարողությունն է: Այն համարժեք է քրիստոնեական մյուս եկեղեցիներում առանցքային նշանակություն ունեցող «Մեսսա»-ին կամ Լիտուրգիա»-ին:

«Պատարագ» բառը պահլավերեն է և նշանակում է նվեր, ընծա: Այսօր այն ընկալվում է որպես զոհաբերություն. Քրիստոսի զոհաբերությունը հանուն մարդկության փրկության:

Ս. Պատարագի հիմքում ընկած է հաղորդության խորհուրդը: Ս. Պատարագի ծեսը հիշատակում է Վերջին Ընթրիքը, որտեղ Հիսուս Քրիստոսը հացն ու գինին, որպես իր մարմինն ու արյունը, բաշխեց իր աշակերտներին:

Դրան առնթեր, Ս. Պատարագի ընթացքում ծիսական արտահայտչաձևերով հիշատակվում են Հիսուս Քրիստոսի երկրային կյանքի տարբեր պահեր ևս:

Հայ եկեղեցու խորհրդատետր-պատարագամատույցը, այսինքն՝ Ս. Պատարագի մատուցման կարգը պարունակող ծիսամատյանը ձևավորվել է քրիստոնեական ընդհանրական եկեղեցու հայրերի ժառանգության հիման վրա, հետագայում՝ քրիստոնեական այլ եկեղեցիներում կիրառվող կարգերից ինչ-ինչ ներմուծումներով: Սակայն հայ եկեղեցու Ս. Պատարագը կազմավորվել և խիստ ինքնատիպ բնույթ է ստացել հայ հեղինակների սկզբունքային հավելումների և խմբագրումների շնորհիվ: Այդ գործիչների շարքում են՝ Ս. Գրիգոր Ա Լուսավորիչը, Ս. Սահակ Ա Պարթևը, Ս. Հովհաննես Ա Մանդակունին, Ս. Հովհաննես Գ Օձնեցին, Խոսրով Անձևացին, Ս. Գրիգոր Նարեկացին, Ս. Ներսես Դ Շնորհալին, Ս. Ներսես Լամբրոնացին, Խաչատուր Տարոնեցին:

Հայ եկեղեցու Ս. Պատարագը, ըստ իր ծիսական խորհրդաբանության, կարող է բաժանվել չորս հիմնական մասերի. Պատրաստություն, Երախայից Պատարագ կամ Ճաշու պաշտոն, Կանոն Ս. Պատարագի կամ Հավատացելոց պատարագ, Օրհնություն կամ Արձակում: Սրանցից յուրաքանչյուրն ընդգրկում է տարբեր դրվագներ և

բազմաթիվ ծիսական հատվածներ:

Ս. Պատարագի արարողությունը կատարվում է հավատացյալների և ծեսը մատուցող հոգևորականների կողմից: Դրանցից պատարագիչ քահանան Հիսուս Քրիստոսի անունով ընծա, զոհ մատուցողն է: Սարկավագը Ս. Պատարագի ընթացքում Ս. Սեդանի սպասավորն է: Նա օգնում է պատարագիչ քահանային և միջնորդ է պատարագիչ քահանայի և ժողովրդի միջև: Իր հրահանգներով, քարոզներով և ընթերցումներով սարկավագն առաջնորդում և ուղղորդում է հավատացյալներին ծեսի ընթացքում:

Ժողովուրդը բացի Ս. Պատարագին ուղղակի մասնակցելուց ներկա է նաև դպիրների կամ դպրաց դասի միջոցով, որի պարտքն է օրհնաբանել Աստծուն, երգել հոգևոր երգերը, կատարել սահմանված ընթերցումները և այլն:

### **Ս. Պատարագի երաժշտական մարմնացումը**

Ս. Պատարագի երաժշտաբանաստեղծական, այսինքն երգվող, ասերգվող կամ եղանակավոր ընթերցմամբ ներկայացվող հատվածները կազմում են մեկ ամբողջություն և հանդիսանում են հայ միջնադարյան պրոֆեսիոնալ երաժշտության արտահայտություն, թեև Ս. Պատարագի և՛ ավանդույթը, և՛ ծիսական մի շարք դրվագներ առաքելական ժամանակների ծնունդ են:

Հայ միջնադարյան պրոֆեսիոնալ երաժշտության զարգացման դասական շրջան է համարվում մոտավորապես V-XV դարերն ընկած ժամանակահատվածը: Վաղ շրջանի առավել պարզ նկարագիր ունեցող պատարագային հատվածները հետագա դարերում առավել հարուստ մեղեդիավորում են ստացել, Պատարագը համալրվել և խմբագրվել է, ինչի հետևանքով այն վերածվել է զարգացած բազմամաս և մեծակտավ ստեղծագործության: Այդ գործընթացում հատկապես հիշարժան է XII դարի հեղինակ Ս. Ներսես Շնորհալու կատարած ներդրումը:

Ուշ միջնադարում կրած մի շարք փոփոխությունների հետևանքով XIX դարի սկզբին Ս. Պատարագի երգեցողությունը, ինչպես հայ հոգևոր երաժշտությունն առհասարակ, ուներ տարբեր երգվածքներ և տեղային տարբերակներ:

XIX դարում հայ երաժիշտներն ակտիվ գործունեություն են ծավալում հայ հոգևոր երաժշտությունը կորստից և աղավաղումներից փրկելու համար: Նրանք հայկական ձայնանիշերով վերագրանցում են հոգևոր երգի միջնադարից ավանդված բազմաթիվ նմուշներ, այդ թվում և Պատարագը:

Հոգևոր Երգի ձայնագրությունների շարքում առանձնանում են Ն. Թաշճյանի կողմից գրառված և հրատարակված ժողովածուները: Պատարագը նա հրատարակել է 1874-

նին Վաղարշապատում. ինչը վերախմբագրվելով հրատարակվել է 1878-ին:

Թաշճյանական գրառումները կարևոր են, որովհետև կատարված են հայ հոգևոր Երզնի՝ Ժամանակի հմուտ գիտականներից մեկի՝ Գևորգ IV Ամենայն Հայոց Կաթողիկոսի երգած օրինակներից, մյուս կողմից հետազայում հենց այս գրառումների վրա են հենվել բազմաձայն Պատարագի օրինակներից երկուսը, որոնք կարևոր են իրենց գեղարվեստական հատկանիշներով և այսօր էլ կիրառվում են Հայ եկեղեցում:

Դրանցից առաջինը Մակար Եկմայանի բազմաձայնած Պատարագն է, որը նա իրականացրել է երեք տարբեր կազմերի համար: Եկմայանի Պատարագում առաջին անգամ կիրառված է նաև նվագարանային նվագակցություն: Չհաշված XIX դարավերջի հայ եկեղեցում իրագործված մի քանի մասնակի փորձերը, փաստորեն, Մակար Եկմայանի (1855-1905) Պատարագը եկեղեցու կողմից ծիսական համակարգի մեջ ընդունված առաջին բազմաձայն ստեղծագործությունն է: Այն պաշտոնապես ծիսակատարության մաս է դարձել 1895 թվականից: Մակար Եկմայանի բազմաձայնած Պատարագն այսօր էլ ամենից շատն է կիրառվում Հայ եկեղեցում:

Կոմիտասը, բարձր գնահատելով իր ուսուցչի՝ Մակար Եկմայանի Պատարագը, այնուհանդերձ անընդունելի էր համարում հայ ավանդական մեղեդիները եվրոպական երաժշտական սկզբունքներով բազմաձայնելը:

### **Կոմիտասյան Պատարագ՝ արական կազմի համար**

Կոմիտասը (Սողոմոն Գևորգի Սողոմոնյան, 1869-1935) հայ դասական երաժշտության հիմնադիրն է: Այս ձայնասկավառակը ներկայացնում է արական կազմի համար մշակված նրա Պատարագը:

Կոմիտասի ստեղծագործական ժառանգությունը բազմաբնույթ և բազմաժանր է: Նա ստեղծել է և՛ աշխարհիկ, և՛ հոգևոր բնույթի ստեղծագործություններ: Կոմիտասի թողած հոգևոր երաժշտական ժառանգությունն ընդգրկում է տարբեր տարիներին տարբեր կատարողական կազմերի համար մշակված Պատարագներ: Դրանց պահպանված վաղագույն հատվածները վերաբերում են 1899-1901, իսկ վերջինները 1910-1915 թվականներին:

Հայ հոգևոր երաժշտությունն ընդհանրապես և մասնավորաբար Պատարագը ավանդաբար կատարվել է արական երգեցիկ խմբերի կողմից: Մակայն Կոմիտասը, Պատարագի վրա աշխատելիս, մեծ խանդավառությամբ դիմել է նաև երկսեռ կազմերի: Մասնավորապես հիշարժան են 10-ական թվականների սկզբին Կոստանդնուպոլսում գործող իր երկսեռ «Գուսան» (մինչև 300 երգչից բաղկացած) երգչախմբի համար կատարված մշակումները:

Միննույն ժամանակ, Պատարագը մշակելիս՝ արական կազմին Կոմիտասն անդրադարձել է 1907 և 1914-1915 թվականներին: Երկու դեպքում էլ նման կազմի ընտրությունն ունեցել է իր կոնկրետ պատճառները:

1907 թվականին արական կազմի համար Պատարագի մշակումը եղել է հանկարծակի և խիստ սեղմ ժամանակահատվածում ստեղծված: Պատարագը մշակվել է Մկրտիչ Ա Խրիմյան («Հայրիկ») Ամենայն Հայոց Կաթողիկոսի հոգեհանգստյան արարողության կապակցությամբ, իր՝ հեղինակի վկայությամբ՝ մեկ շաբաթում: Այս դեպքում, նկատի ունենալով ծիսական ավանդույթը, արական կազմն անհրաժեշտ էր: Ցավոք, այս Պատարագից միայն հատվածներ են պահպանվել:

1914-1915 թվականներին մշակված Պատարագը երկրորդն է, որ նախատեսված է արական կազմի համար: Այն նույնպես ստեղծվել է կարճ ժամկետում: Արական կազմին դիմելը այս անգամ պայմանավորված է եղել առաջին համաշխարհային պատերազմով: Կոմիտասի երկսեռ երգչախմբի գործունեությունը հարկադիր դադարեցվել է, քանի որ արական կազմի մեծ մասը զորակոչվել է բանակ: Կոմիտասը ստիպված է եղել վերակազմավորել երգչախումբը՝ հավաքելով փոքրաթիվ կազմով արական խումբ: Այս երգչախմբի համար էլ, Ռ. Աթայանի ճշգրտած տվյալներով, 1914 թվականի հոկտեմբերից միկչև 1915 թվականի գարունը Կոմիտասը ստեղծել է իր արական կազմի համար գրված Պատարագը: Դրա առաջին կատարումը տեղի է ունեցել 1915 թվականի ապրիլի 17-ին՝ Ս. Հարության Ճրագալույցին և հաջորդ օրը Ս. Զատիկի Պատարագին: 1915 թվականի մայիսի 2-ին նախատեսված կատարումը չի կայացել՝ պոլսահայ մտավորականության հետ Կոմիտասին ևս արտոբերելու պատճառով:

Սակայն Կոմիտասի Պատարագի պատմությունն այսքանով չի սահմանափակվում:

Մեծ եղեռնից հետո, Կոմիտասի հիվանդության պատճառով, նրա հատուկտոր պահպանված ժառանգությունը կարգի բերելու և հրատարակելու աշխատանքները ստանձնել են անհատ մտավորականներ, ապա և հատուկ հանձնաժողով: Այս ստեղծագործությունը Կոմիտասի աշակերտ Վարդան Սարգսյանի գործադրած ջանքերով խմբագրվել և հրատարակվել է Փարիզում 1933 թվականին:

1997 թվականին Երևանում տպագրվեց կոմիտասյան Պատարագի, Երաժշտագետ Ռ. Աթայանի կողմից վերակազմված բնագիրը՝ տարբերակներով և հարակից երգերով:

Կոմիտասն իր ամբողջ ստեղծագործական կյանքի ընթացքում աշխատեց այս երկի վրա, որը դարձավ իր մեծակտավ ստեղծագործությունը: Կոմպոզիտորի կյանքի և հայ ժողովրդի պատմության այլ ընթացքի դեպքում գուցե թե ունենայինք Պատարագի այլ տարբերակներ ևս: Սակայն, կոմիտասյան Պատարագի արական կազմի համար

մշակած այս տարբերակն էլ հայ դասական երաժշտության գեղարվեստական բարձրարժեք և ամբողջական մի նմուշ է, որն ստեղծվել է, ինչպես ծիսական, այնպես էլ համերգային լիարժեք կյանքի համար: